

四庫全書

集部

欽定四庫全書

集部  
樂全集卷二

詳校官庶吉士<sub>臣</sub>龍廷槐

檢討<sub>臣</sub>何思鈞覆勘

總校官中書<sub>臣</sub>朱 鈐

校對官中書<sub>臣</sub>吳 俊

謄錄監生<sub>臣</sub>周克鵬

欽定四庫全書

集部三

樂全集

別集類二宋

提要

臣等謹案樂全集四十卷宋張方平撰方平字安道宋城人舉茂材異等為校書郎歷官參知政事卒贈司空謚文定事迹具宋史本傳其自號樂全居士因以名集蓋取莊子樂全之謂得志語詳所作樂全堂詩中其集見

于宋史藝文志者四十卷與此本合東都事  
略王鞏行狀尚載有玉堂集二十卷而方平  
在翰林時代言之文如立太子除宗諤節度  
使韓琦守司徒呂公弼樞密使李昭亮殿前  
副都指揮使諸制見于宋文鑑者此集皆無  
之知當在玉堂集中而今已亡佚所存惟此  
集而已凡詩四卷頌一卷芻蕘論十卷襍論  
二卷對語策一卷論事九卷表狀三卷書一

卷牋啟一卷記序一卷襍著一卷祭文碑誌  
六卷方平穎悟于書一覽不忘善為文數千  
言立就才氣本什伯于人而其識又能灼見  
事理剴斷明決故集中論事諸文無不豪爽  
暢達洞如龜鑑不獨史所載平戎十策論新  
法疏為切中利弊蘇軾作序以孔融諸葛亮  
比之論者不以為私亦可信其卓然無愧立  
言之選矣遺集流傳甚少此本首尾頗完善

慎字下皆注今上御名四字蓋從孝宗時刊  
本抄存者特不載蘇軾原序疑傳寫者所遺  
脫今併為錄補冠于卷首以存其舊焉乾隆  
四十四年九月恭校上

總纂官臣紀昀臣陸錫熊臣孫士毅

總校官臣陸費墀

樂全集序

孔北海志大而論高功烈不見於世然英偉豪傑之  
氣自為一時所宗其論盛孝章郝鴻豫書慨然有烈  
丈夫之風諸葛孔明不以文章自名而開物成務之姿  
綜練名實之意自見於言語至出師表簡而盡直而不  
肆大哉言乎與伊訓說命相表裏非秦漢以來以事君  
為悅者所能至也常恨二人之文不見其全今吾樂全  
先生張公安道其庶幾乎嗚呼士不以天下之重自任

久矣言語非不工也政事文學非不敏且博也然至於臨大事鮮不忘其故失其守者其器小也公為布衣則頎然已有公輔之望自少出仕至老而歸未嘗以言徇物以色假人雖對人主必同而後言毀譽不動得喪若一真孔子所謂大臣以道事君者世遠道散雖志士仁人或少貶以求用公獨以邁往之氣行正大之言曰用之則行舍之則藏上不求合於人主故雖貴而不用用而不盡下不求合於士大夫故悅公者寡不悅者衆然



至言天下偉人則必以公為首公盡性知命體乎自然而行乎不得已非蘄以文字名世者也然自慶厯以來訖元豐四十餘年所與人主論天下事見於章疏者多矣或用或不用而皆本於禮義合於人情是非有考於前而成敗有驗於後及其他詩文皆清遠雄麗讀者可以想見其為人信乎其有似於孔北海諸葛孔明也軾年二十以諸生見公成都公一見待以國士今三十餘年所以開發成就之者至矣而軾終無所效尺寸於公

者獨求其文集手校而家藏之且論其大畧以待後世之君子昔魯公嘗為軾言公在人主前論大事他人終日反覆不能盡者公必數言而決粲然成文皆可書而誦也言雖不盡用然慶厯以來名臣為人主所敬莫如公者公今年八十一杜門却掃終日危坐將與造物者游於無何有之鄉言且不可得聞而況其文乎凡為文若干卷若干首蘇軾撰

欽定四庫全書

樂全集卷一

宋 張方平 撰

律詩

皇帝狩于近郊

內署同進  
并別狀

伏觀皇帝陛下順茲冬令狩于近郊以臨農疇以蒐軍  
實運用乾健烜揚天聲事已而旋禮無違者臣等叨處  
詞禁幸陪詔蹕謹抒歌詠粗章盛節各齋沐賦成皇帝  
狩于近郊律詩一章謹隨狀上進以聞

講事時農隙旂車此狩畋旌門開霽野帳殿拂霜天星  
斗隨華蓋風雲逐寶鞭翼開花浪急圍合錦城圓射狡  
無遺鏃從奔必應弦迹人輕過電騎隊速回游驚翮紛  
爭擊材盧亦競先亟來餘逸足徑下不虛拳勇氣凌金  
鼓懽聲雜箎絃抗綏分逆順植表閱周旋湯德逾三面  
堯心豈兩旻頌禽均近列賜帛及高年坐幄陳慈宴停  
輿勞力田鳴鐃迴綵仗斜日下潑泉寧校虞旗獲聊供  
廟俎鮮簡稽嚴卒乘典制寓蹄筌甫草深懷古礪溪念

得賢威靈增震耀徒旅靜喧闐羽獵嘗歲漢車攻昔美  
宣詞臣茲紀詠抑未愧前篇

大禮慶成

并引  
狀

皇帝陛下躬祀天地嚴配祖考百禮交舉而莫有違者  
萬靈來顧而罔不歆焉仍自發冊之朝以至肆赦之日  
風氣時順雲物晏溫大衆之都羣方畢會喜覩容典抃  
舞相慶非上聖陟降庭止其孰能至于是乎臣等獲預  
近班親瞻盛事抃歎不足輒撰成五言詩十韻宣曰掄

揚休烈亦臣子愛戴之誠

饗帝精禋舉嚴親廣孝純禰宮增懿典皇冊薦威神寶

殿齋居肅琳房獻禮陳慨瞻清廟几穆奠紫壇茵備樂

嘉安曲鴻儀顯相臣玉從丹禁出

禮神之玉出自禁中

路儼繡旂

新新造玉輅

今方御之

瑞靄蒙天仗祥風入帝宸懽呼九州會慶

澤萬方均有幸逢華旦無謨翼至仁但祈陪百禮景扈

越千春

九日侍宴太清樓

并引狀

今月九日蒙宣召赴後苑穫稻觀橙及太清樓射弓侍  
宴者秋肅商旻日重陽琯春蕭辰之節物綴宸賞於園  
游因宴示慈俾人同樂伏惟皇帝陛下治猷時乂聖問  
日躋裁成太和丕覆羣品清籟之田是穫稼作爾甘上  
林之苞素蕃天成其實駐玉輿而省斂恣荷橐以榮觀  
而復頒以天官之餘輟於果丞之供並拜君賜交荷  
上仁方且坐寶構之重深旅飛蕤之雜襲彫弧在穀具  
相圃之和容大筭連飛餘西山之勁氣賚金咸暨醉露

云晞泱愷樂之洪私極亨嘉之盛遇臣等幸叨景從俯  
激歡衷相趨舞歎之餘綴伎游揚之末冒陳清覽增集  
腆顏謹齋沐各抒成九日侍宴太清樓詩一章謹隨狀  
上進

登高聞舊俗況此奉堯觴鳴蹕遙空下層樓顥氣傍御  
溝新過雨苑樹未經霜楚澤丹苞重吳畦紫穗香三侯  
天縱妙九節召南章中宣矜多藝威將懾四方清時人  
共樂白日坐間長近從叨慈渥區區祝壽昌



上享郊廟

并引狀○慶歷四年甲申十一月二十五日壬午冬至

伏以皇帝陛下寅恭郊祀罄竭精衷乃吉日已卯齋宿  
路寢翌日款謁景靈宮朝饗太廟遂有事於園丘以見  
上帝瑞應昭答盛禮告成聖意德音皆可書為後世法  
臣執綏驂乘尤見詳悉謹用賡成享廟裡郊詩二章章  
八韻誠不足闡揚丕顯休命之萬一然事皆紀實可以  
備史筆之闕是亦臣子區區之誠者也

享廟

瑞雪清晨集丹墀發策初

皇帝大慶齋宿之日先發改上五后尊謚冊寶

德音

聞徹蓋

是日雪大作左右進蓋有旨不御

玉色望升車

先是禮官上儀注冊寶出殿門

上退還次有詔俟冊寶升車進發乃還次

羽衛排闥闔晴光溢紫虛

比曉升路齊月

然琳宮陳玉幣

先薦享景靈宮玉用四圭有邸幣用青

疏屏宿旌旗裸獻

多儀備絃匏九變徐

有詔樂畢九奏不許減節

太官無盛舉

上自齋宿不舉

盛饌掌次省先除

兩廟設小次不御立以終禮

靈鑒紛昭格天心不自

舒孝慈更答告萬福此攸儲

裡郊

回仗由黃道鳴鑾入翠宮  
懽思文武侑

園丘之祀太祖皇帝太宗皇帝

并升誠與地天通  
登陞行祠徹

慶厯元年親郊始改園丘上一成黃道用緋藉

至是有詔悉徹之仍命曲臺編入禮令永為常式

終祠坐幄空

上即壇所端立以至禮畢不還

次風雲歸絕域  
星斗下遙穹

是日恬無微風瑩無纖雲星斗離離如下臨享壇

際柴煙白龕層燭焰紅  
氣祥書魯觀

至日雲物黃潤四望一色太史奏有

年之福嘏萃堯躬  
海上雞星動樓前馬隊雄

是日御端闈肆眚畢

閱捧日奉宸等隊

僕臣殊幸會獨得近重瞳

臣忝攝太僕忝乘陪禮

升祔慶成

明詔初發中奉慈講升祔考典下容臺集議付近署變  
禮稽國章大義推經據叅覆經宰司裁定皆宸慮獻后  
正壺儀仍几被遺顧擁佑隆帝室清夷贊王路懿主鍾  
景命謀宮開慶祚靈長繫發祥熙洽本垂裕蓬闕邈仙  
輶柏城拱寒樹別饗隔昭穆時思怵霜露陽月日上辛  
齋居待清曙當衙薦寶冊夾道陳鹵簿玉色儼莊栗淵  
衷緬馳慕端闡出翟車黃道回天步千官陪祠庭祕祐  
寧神御威德配不祧至孝始如素穹厚昭精純蕃夷入

儀注渙汗肆慶宥需雲均膏飫廣愛形海區教忠憲侯  
度下臣叨載筆書法資典故

大祀禮成

皇祐五年

皇心奉先孝威德事天明嚴配講隆禮三聖並侑精禋

格至誠衣冠先示質

臣慶歷四年攝太僕竊觀衣冠及諸服御皆此再攝

不易舊聖心尚質貴誠之意也

金石始諧聲

郊廟始用新製鐘磬及以晉鼓鼓金奏

鬲享

初登熟鋒和用啟牲

始循古制鑄牛羊豕及用鸞刀啟牲

百神虔受職

萬物樂由庚星斗羅空碧柴煙徹紫清祥曦回羽衛佳

金匱要略卷之三  
氣覆瑤薨雷雨金雞動風雲鐵馬輕靈休紛報貺宸念

在持盈

臣陪輅屢被顧問  
聞持盈守成之言

孤陋叨華近何辭頌泰平

喜雪

慶歷二年  
仁宗命作

愆陽千歲事齋殿軫予憂默為斯民禱心從六事求同  
雲俄蔽景盈尺忽呈休淅瀝千瓊樹崢嶸萬玉樓塵氛  
開紫宙氣象露皇州鵬鶚精神勁松筠操稟優邊庭傷  
久戍農畝慶來甦咨爾臣鄰地常期九叙脩

送內閣蔡公歸闕

豐宮周舊宅梁國漢東關尹正司留鑰賢公出近班教  
條推愛利滋蔓悉除刪狹野耕桑急終年獄市閒燕申  
鈴閣靜榮養彩衣斑治迹經綸外陰功造化間士林歸  
北海人望在東山一節遄趨召西轅不可攀前旌霜樹  
曉候騎古河灣和氣均生物淳風復海寰具瞻知可副  
威德致無艱他日開鑪冶餘功為鑄顏

送吳春卿赴都

法座臨軒策俊髦同君陞見預旌招疲驚十駕始千里

孤鷲一飛先九霄  
蘭棹秋風行邈迤  
觚稜旭日勢崑崙  
石渠為謝諸時彥  
行邁同趨便殿朝

送冀州李太傅

多君貴主子材識  
乃名儒青海渥注  
種丹山鸞鳳雛兵  
家左車後書法右  
軍無擁幄羞紉袴  
懷章就隼旟亭臺

煙水閣樓堞暮雲扶

信都郭東連大澤亭榭觀游在焉

析木元分冀渚

沱漸近胡雙觥雖蘊藉

文和在瀘淵故事

重閉勿須吏誰道長

城遠今觀出上都



送李芝東歸

此君齊魯之奇才三十病廢吁命哉來遊京國動悽悵  
東歸泰山卧崔嵬支離攘臂福所倚功名累身古共哀  
但恐人求駿馬骨未免却上黃金臺

送蘇學士錢塘監郡

趣時貴近君獨遠此情於世何所希車馬塵中久已倦  
湖山勝處即為歸洞庭霜天柑橘熟松江秋水鱸魚肥  
地鄰滄海莫東望且作阮公離是非

呈資政宋尚書

當年留鑰守陪都龍坂因茲得曳裾北海一章慙驚鳥  
松江三歲厭鱸魚賈生感事多垂涕園令居閒輒著書  
獨恃明公念孤介東郊未去逐長沮

送石曼卿赴闕

功名本不與人期人取功名亦繫時蜀相閒居久龍臥  
馬周狂醉竟誰知將軍身到衡廬問英主心驚奏牘奇  
宣室思賢方空席去陳經濟勿遲遲

重送趙叅

叅也堂堂氣拂雲十年策蹇四方塵  
羈窮自古有元叔精鑒觀今少法真  
驥在駕羣殊有態龍初魚服未能神  
君看渭曲傳巖事天困斯人必有因

送馬武

才命相憎不相並古來達者齊其中  
此君寂寞年雖暮靈府崢嶸事甚雄  
講上鷹飢思掠草車傍驥老尚追風  
丈夫掩棺始為了是故南陽晚立功

送張寬

得喪竟誰尸人謀不可移獨看屠釣叟達迺帝王師大  
觀齊諸物雄圖彼一時君思塞上說孰可預端著

送張郎中赴闕

明公才氣本雄傑晚戴儒冠腰拖紳講劍妙傳勾踐術  
工書兼得伯英筋外臺共歎郎潛父中檢行膺帝命新  
司列不煩詢治狀幾州樂社有遺仁

送宋秘丞赴任鄱陽

蕭灑武夷秀茲人美且偲治經通古學應務富時材盡  
在脩書選行須造幣迴更研輕重術歸奏阜民財

送祝生東陽簿

之子東南美聲光滿貴游溪山聊薄宦才調自名流野  
趣雖孤艇清涂即十洲金波沁園宴遲子有賢侯

送客游充海

寒飈慄冽響吹空雪意沈沈歲向窮正是兼衣御醇酎  
如何孤蹇逐飛蓬杉松古色泰山廟絲竹遺音夫子宮

訪舊自堪寬旅瑣賢侯況似蜀文翁

送楊君西安

君過嚴陵瀨扁舟入婺溪灘長秋日短山亂暮雲齊未  
探驪龍領聊羈駿馬蹄吳江濤正惡鴻鴈此東西

君之  
昆子

莊學士赴四  
明倅同行

送客入洛

高歌彈缺酒盈鍾壯士何須歎道窮客路歲闌天又雪  
旗亭醉別氣如虹驥騰夷路思良御帆破長波待便風

今子方為采蘭役未宜去揖紫芝翁

送福州監郡陳殿丞

七閩一都會乃是無諸城海近氣物異山遙風候清  
宦游過鄉美君祿及親榮去去倚門念溪船歸棹輕

送陳汝玉謁三川大資政左丞吳公

育

吳公昔作河南尹首唱儒風薦賈生今日治平承祖德  
可無推引助文明

謁青州范天章

劍橫驢膊儒裝陋戟列臺門霸府雄喜似禰衡逢北海  
直須雷煥辨南豐謬悠為說非今味踈畧言詩粗古風  
更似賈生多歎息聞公真賞勝吳公

送沈生昆弟隨侍之博白四絕句

炎方景象異中原海氣昏昏雜瘴煙今日荒夷成雅俗  
薰風南播自嫖絃

不須南浦懷消黯好過西山訪隱淪比到嶺時應近臘  
相思可寄一枝春



東連海道徹扶桑北望神臯斗柄旁  
兩處音塵杳難接  
征鴻歲只到衡陽

夕陽疎葦暮江湄秋色蕭蕭動客思  
自侍嚴君領州去  
宣同騷客夢邊時

呈范天章

詔起東山對紫庭清風蕭灑動堦  
堦莫謹言幾為忠邪發  
大用須憑廟社靈武庫神兵羅斧戟  
大宮禮器列籩鉶  
願公早入當鈞軸重演三篇相武丁

送郭誠思歸華下

忘懷物外且如愚何事勞精據槁梧以馬喻馬即非馬  
數輿無輿方得輿莫執斧斤過櫟社懶施几席向遽廬  
好歸玉秀峰前坐閒看晴雲自卷舒

送汾陽高士歸三峰

君深於易遇  
至人遂不食

知逢三洞客曾指九丹方氣抱冰霜冷神含日月光閒  
軒同鶴靜妙境入龜長它日南峯路相期過華陽

送邢遁山人

忽悔輕拋雲水來，便將鶴去指林齋。  
生涯琴劍外無物，日逐醉吟中遣懷。  
舊隱居常因夢到，塵遊動是與心乖。  
送君翻自嗟羈滯，木葉脫時還計偕。

送趙先生

家住崆峒塞垣上，翩然遊蜀遂忘歸。  
九還氣足通神化，一日丹成是道機。  
曾共靈龜波上隱，又隨蒼雀火中飛。  
只於醉裏藏身去，休入紅塵作是非。

送珪師歸衡嶽

師通禪律外外學二篇微

師精大衍

貌似寒山古身隨風葉

飛瀟湘曾曉夢鴻鴈伴南歸七十三峯裏雲庵拂舊扉

送僧南遊雪竇

早出都門何往哉四明雪竇指崔嵬便從古道揚眉去  
莫到寶山空手回乘月曉行松露濕迎風晚渡海濤來  
普賢樓閣知非遠邈迤南遊想善財

贈韋不伐

莫隨世偽作圓方坦坦無邪是履祥學鄙淺訛趨古道

天教軼軻與剛腸  
俛投胯下人皆笑  
獨臥隆中自不常  
畢竟途窮無所合  
何妨持釣坐滄浪

充海孫學士寄示畫錦編述先德宣公進退之  
美報之長句四韻奉揚盛事

鄒魯衣冠古士鄉  
義方不獨有扶陽  
德名垂世先君子  
經術傳家小太常  
閭巷共榮新畫錦  
吏民同愛舊甘棠  
前人彝鼎銘勲伐  
未似盈編盛事光

贈趙先生

金定四庫全書  
卷一  
此老得天樂自稱雲水人佯狂不妨道太息漫勞神沈  
醉少醒日與遊多逸民常憂忽不見無處訪清塵

贈三茅朱先生

鬱儀結鄰太霄道金璫玉珮虛皇冠鑪中火候煙霞煖  
壇上磬聲星斗寒紫節晨遊從玉女綠輶夜降接靈官  
願持璧紐充盟信乞取胎精九化丹

玉泉觀贈高道士

古屋氣象冷蒼崖煙翠中龍歸半天雨虎嘯一巖風露

後芝房紫霜餘栢實紅終期把藜杖來伴白雲翁

贈郭誠思

壯志本桑弧當年亦棄繻塵游謝京國火記得鄴都露  
氣凝瓊樹冰光澈玉壺世間出世法胎食即天厨

贈趙抱一

君隱居兩當石門後更  
深入紫栢山人迹絕矣

石門路已絕塵寰紫栢高深不可攀野客蒼茫連遠水  
暮雲慘澹裏寒山琴碁有徇皆為役松竹無情且共閒  
卉醴一盃時自釀陶然亦可發朱顏

君童子時遇道士  
與一桃啗之遂不

食嘉祐七年余領秦邀君至七十餘夫不食已六十餘  
年髮白面紅亦不甚異於常人云山中乏酒釀蜜飲之  
亦可醉道書  
謂蜜為卉醴

贈青城山威儀觀李鍊師

天倉三十六峰下猶有軒轅轍迹存丹竈前臨六時水

芎田遠接九仙門

九仙竇雲洞近後觀

火芝夜照千燈迴江樹朝

涵一氣渾道友相邀尋異藥攜筇幾到老人村

贈終南李道人

神仙靈藥自然功五色光中一氣通借問叅同相類法



何如相類即叅同

贈琅邪智先長老

師臘八十六

山路層層峻幽棲最上層  
淨光懸海月幻體任春冰  
四句有為法一心無盡燈  
我來忘所問相伴又騰騰

贈辰長老

燕坐非持律遊方不學禪  
長空任飛鳥古澗自寒泉  
見月何須指追風不待鞭  
平生一破衲隨處伴閒眠

贈崆峒天水公

天下赤龍訣人間金液丹先生今已得此事古傳難陰  
德留塵世仙階在廣寒舊聞三五一乞取畧開端

送徐總

半醉長呼意若何官情道味兩蹉跎眼前漸漸故人少  
世上紛紛新事多疎籟自鳴非節奏虛舟妄觸任風波  
悲歌深歎流年急常憶江南藍采和

送杜山人

山人山行見虎輒  
同路而行又善嘯

到不說來處去安知所之野雲同自在溪鳥與誰期虎

伴閒行遠猿驚住嘯遲相逢聊一醉重見又何時

宋屯田歸湖南

舊學孫明復春秋助發微

儒者孫復字明復撰春秋尊王發微君常預講論

倦

遊驚白首知己失緇衣

故司徒陳恭公常薦君

乞了朝雞去南隨

社鷺歸衡湘多隱逸道侶未應稀

筇杖贈凌生

生有官不仕無妻子

山居知獨處一杖代兒曹試水溪沙淺挑雲嶺路高訪

僧歸有伴採藥遠忘勞它日蓬萊會應騎過海濤

都官葉舒郎中歸三衢

宗邸橫經授小侯跡同半隱久沈浮却尋故國溪山路  
多謝朝堂鐘鼓樓冉冉年華成老態紛紛時事作閒愁  
一丘一壑平生志况有門人伴釣遊

樂全集卷一

欽定四庫全書

樂全集卷二

宋 張方平 撰

律詩

微子廟

西伯已招二大老東隣更棄三仁人  
元龜遂訖商家命白馬永為周室賓  
抱器幸存天鳳祀喪邦都為牝鷄晨  
可憐長發源流遠舊國猶存廟樹春

秦州北山云是隗囂宮登城樓下瞰偶題

宛下君臣實免戲昆陽勝敗非人力劉秀其來異獨夫  
隗囂何事為西伯送質已是不能強保險明知本無策  
惟其得士似田橫後世英雄共嗟惜

讀杜工部詩

文物皇唐盛詩家老杜豪雅音還正始感興出離騷運  
海張鵬翅追風騁驥髦三春上林苑八月浙江濤璀璨  
開鮫室幽深閉虎牢金晶神鼎重玉氣霽虹高甲馬騰  
千隊戈船下萬艘吳鉤鋌莫觸羿彀巧無逃遠意隨孤

鳥雄筋舉六螯曲嚴周廟肅頌美孔圖褒世亂多羣盜  
天遙隔九臯途窮傷白髮行在窘青袍憂國論時事司  
功去諫曹七哀同谷寓一曲錦川遨妻子飢寒累朝廷  
戰伐勞倦遊徒右席樂善伐干旄舊里歸無路危城至  
輒遭行吟悲楚澤達觀念莊濠逸思乘秋水愁腸困濁  
醪耒陽三尺土誰為翦蓬蒿

題楊大年集後

天上靈仙謫人間秀氣涵朱絃清廟瑟美榦豫章枏富

艷三千牘從容八十函

朱齡石

典純追古昔雅正合周南溫

粹瓊瑤潤滋醲稼穡甘微中緘海蚌巧處吐春蚕璀璨

龍宮出精深虎穴探機衡成艷琬嵩洛入煙嵐

公勁正不容權

倖謝病歸陽翟因就除知汝州

寂忍修禪智虛柔慕史聃驥轅曾未騁

鸞馭不停驂巖廟登何數承明入獨三可憐經濟意舊

客記高談

門人黃鑑錄公餘論為談苑

讀王朴傳

世主英威動九陽高賢事業出巖廊何須夢卜疑千古



灼見雲雷定四方小國霸圖微管葛當時人傑自蕭張  
不終制作成遺恨律準今猶在太常

讀素書

孺子圮橋跪履年七章德在穀城仙所言道德帝王事  
不比盤盂長短篇晚欲出塵應有訣初行遇漢豈非天  
蕭曹勲業皆勞力寧似功成樽俎前

過豐

劉季當年在古豐芒碭王氣已連空天機先露由啼姬

人意冥符自董公歷數有歸徒勝負風雲相會盡英雄  
不然樊鄴蕭曹輩盡老屠商榷吏中

過沛題歌風臺

落托劉郎作帝歸樽前感慨大風詩淮陰反接英彭族  
更欲多求猛士為

題中陽里高祖廟

縱酒踈狂不治生中陽有土倚兄耕晚遭亂世成功業  
更向公前與仲爭

臨淄同劉仲方作

迴合空山萬疊蒼礚溪投釣此開疆儒家俎豆連洙泗  
戰國戈鋌接楚梁四嶽子孫終海嶼諸田意氣盡尸鄉  
不惟仲父能輕重形勝由來自霸強

劇孟

人物無重輕廟朝有失得世平徒匹夫時搖一敵國姦  
雄望風塵冠劒動慙色治庭不論功聲名輝典策

讀齊世家

默坐磻溪素髮垂商周於此繫興衰機深正似忘機者  
應被沙鷗靜處窺

讀楞伽經

楞伽三萬六千偈百八句中成自性法法非法離法塵  
心心無心入心病漸熟當似菴羅菓頓照猶如大圓鏡  
龜毛兔角妄有無海浪空華不清淨

讀混元經

五行生成本一氣曉此體用知命樞還元當復定金鑠

過宿寧更懷蘧廬無質生質是丹地有象非象真壇圖  
此途得道亦連袂遲晚須乘八景輿

寂默通真說因戒而定云是小乘漸法然至則  
成大其致一也趙少師叔平覽之有疑見問  
以此答

即定非存出入間照而常寂所居安將心起用知逾遠  
有眼無光見亦難向上本來惟一路初機聊為立三關  
莫於此地分延促彈指時中海水乾

讀坐忘論并序

唐書潘師正傳初陶隱居傳正一之法於王遠知遠知以傳師正師正以傳司馬子微故潘謂司馬正一至汝四世矣陶隱居每謂門人曰吾於建元永明間仕不過奉朝請使吾爾時官得志豈有今日事耶詳此隱居所得深矣然為時主禮重竟不見其異迹至人守中抱一固不為異也至子微著坐忘論五時七候簡要易行本自正一暇日覽味因成長句

正一初傳王遠知後來體用益精微惟無矜貴為真地  
但涉成虧即世機松徑風聲猶有待糠鑪火候事終違  
便令直了九丹術不到坐忘何處歸

覽九丹上化經寄南都王宣徽君貺

上清紫簡世傳稀中有靈都妙旨微雲霧披光丹鳳出  
風雷接勢赤龍飛琴心三疊胎仙舞籥箎雙迎帝子歸  
幸得九天真一訣塵勞何事尚依依

讀穆天子傳

八龍長驚造崑丘七萃前驅縱逸遊遇雪自裁黃竹唱  
捧觴喜答白雲謳羽陵廣奏隨風逝崦阜銘蹤共日留  
惆悵壁臺人不返樂池遺恨素波愁

讀樊川集

不遇元和得獻謨望山東北每長嗟獨賡唐律雅風後  
更注孫篇俎豆餘雪水勝遊成悵望杜川歸事竟躊躇  
中年遽使山根折盡寫雄襟在此書

讀杜詩



杜陵有窮老白頭惟苦吟正氣自天降至音感人深昭  
回切雲漢曠眇包古今萬壑入溟海一枝成鄧林掩抑  
鬼神泣寂寥星月沈珠憑罔象得玉看晶采尋穰穰豐  
年穀磊磊殊方琛病源問岐伯兵畧須淮陰流寓四方  
路浩蕩平生心每覽述懷篇使我清淚淫

題英烈王廟

伍子胥祠  
在楚州

固云志在修私怨破郢其如不利吳由此夫差心遂侈  
鴟夷豈得謂非辜

東方朔

不獨巖扃與市塵金門亦可晦吾真孤風大義人誰見  
宣室聊曾抗倖臣

天聖中年嘗有異夢熙寧癸丑退居南臺聊記

舊事

凌空素閣彩霞鮮舊侶相容見九玄上下登梯一童  
子逡巡離座六靈仙踈瞻寶案凝神久手納金匙受  
記專病卧夜長思此境忽驚四十有三年

侯君房

爵位功名可自豪青雲志士豈而曹

嚴子陵謂光武曰士固有志何至相

迫一朝黃鉞看看下

馮勤傳

始愧狂奴故態高

被命中山以親老不赴書懷寄集賢曾公叅政

趙公

野懷常逐白雲飛疎拙那能合世機偶似曹溪一宿覺  
已多遽瑗九年非畧呈幻事何須了惟願朝恩早放歸  
它日蓮華峯下去猶期話道過黃扉

上三司蔡內閣

此日河南念賈生留將名字徹丹庭秋聲漸覺寒生樹  
親老遙知獨倚扃徒繫車傍淹白晝得離韉上必青冥  
公如未信牛間氣試掘豐城必有靈

謝范天章薦應制科

明道二年

初闢明堂見帝軒此時寧得戀丘園程文懶謁春官氏  
決策思干法宸尊千古聲名傳鸚鵡表四方豪俊望龍門  
若趨丹陛承清問何以酬知或敢言

次韻酬潭州周沆學士見寄

鰲背三山壓海濤，雲臺高議接時髦。  
一麾忽到江湖外，回首方驚日月高。  
不善取容同曼倩，且歌樂職學王褒。  
賈生自是長沙遠，更弔湘纍賦廣騷。

貽龔懋

所至輒驚座，歸來成淚痕。  
憐君孤劒客，擲謁五侯門。  
驕氣羞紈袴，涼風憶故園。  
時清經世事，捫蝨為誰言。

寄徐白父客襄漢

避暑鹿門寺虛齋風竹涼草連邛國遠水接漢川長寓  
客懷江表騷人愛楚鄉京塵誠可厭君未捨名場

寄高弁侍郎

大雅久頽弊夫君真古人道維皇極正文著帝刑淳公

帝刑五篇美望鏘金石深誠照鬼神立朝惟一介為郡有遺

仁素尚陶弘景風流賀季真歲寒松有節明瑩玉無塵  
霜簡雖清重銅符亦久述老成急登用必有及斯民

寄汾陽郭先生

君家白雲外巖溜響嘈嘈絕壑風煙澹孤峰冰雪高自  
能無世累誰見有生勞指我蓬壺路瓊宮隔海濤

寄三峰郭誠思

松檜峰前古栢林結茅無伴對幽禽鄙為浮薄八公事  
獨入精微九聖心春斲晴川閒種玉夜開丹竈試還金  
冷然風馭知何返三十六闕雲路深

訪朱先生值晝寢

一枕清風靖館深滿庭松檜鬱交陰此時真境誰人見

月在泥丸日在心

寄代淵

塵走我何勞巖棲君愈高林齋且吟嘯世路盡風濤小  
桂閒招隱西岷續返騷氣機衝不露承弁縱雙毛

貽劉几

家自唐來世大儒惟君不肯讀家書春遊爛漫少曾醒  
俊氣飄揚頻得廬早講猿公飛劒術更通風后握機圖  
何時羽獵長圍合請看雲中一鸚鵡



謝韓仲文學士送白竹簾

帶粉裁疎節，凌霜剪翠筩。  
鯨鱗鋪海浪，鵬翅展天風。  
暖恐春冰釋，清宜曉鬼融。  
露華流沆瀣，寒色凜崆峒。  
栩栩來莊蝶，翦翦失夏蟲。  
枕須松石碧，幌鄣霧綃紅。  
坐覺非塵境，竊如在月宮。  
北窻聊寄傲，俗骨愧方瞳。

金陵久旱喜雨呈運使韓綜學士提刑令狐挺  
祠部及示諸府僚

江城風日燥，將燃喜此滂。  
沱僅有年，諸澤氣交陰。  
壓地

四溟水立閣圍天廊開紫宙清涼界頓去驕陽跋扈權  
須信化工人可代傳巖才業在三篇

提刑祠部再和前篇猥為禱祈之應輒復次韻  
且以見志

長吏憂民深望歲諸侯閔雨著編年鵝鮮聊用遵明詔  
砥鼻何能感上天五事肅時斂在宥九功美利屬持權  
守藩無狀惟推分心在蒙莊內外篇

謝浙漕劉忠順郎中送簞

玉水一方光潑灩霜華八尺翠琅玕卧來病骨殊清快  
勝餌西山五色丸

近自鍾山採松花和湯甚美按本草經木部上品松花名松黃拂取似蒲黃輕身療病云勝  
葉節及脂松脂一名松肪淪入地千年為茯苓又千年為琥珀又千年為鑿一名茯苓通  
神而致靈和魂而鍊魄明竅而益肌厚腸而  
開心調榮而理衛上品仙藥也久服延年陶

隱居云松有脂潤又凌冬不凋理為佳物金匱方書葛洪所撰仙經曲晨丹用琥珀鍊合送湯一甕呈仲文學士

青松北山麓春藥摘金團芳澤逾肪節滋華本歲寒功傳上品藥餌勝曲晨丹一泛彤霞液天和入肺肝

日精月華所滋結金匱瓊笈稱靈珍味勝仙人掌中露色如遊女衣上塵餌之伐邪鍊神魄久且長年登高真輕瑩茯苓乃淪滓嘉賞當問清遐人

居憂過祥制示辰長老

流景無端隙駟馳永懷顧復感慈闈幸茲門外車馬少  
更復朝中書信稀裒颯顛毛素絲短苾佯病眼亂花飛  
舍西賴與招提接時叩禪關話祖機

貽辰長老

同流誰往還終日掩柴關壁觀少林寺門風先洞山

承師

臨濟源出洞下道場隨處是心地本來閒指我常河水都忘鬢

髮斑

離都招友人

車馬交塵路不停  
勢家門巷密如萍  
張湯筋力奈寒暑  
樓護口舌搖風霆  
機牙潛發如馳傳  
聲影相連若建瓴  
此地豈容山野客  
盍歸乎來掩巖扃

慶臺韓子華寄示清居大士牧牛圖頌酬寄長

句

香嚴昔向瀉山住  
只作田翁學牧牛  
路絕纖塵寧見迹  
野無寸草漫迴頭  
晴天任去雲作伴  
露地閒眠夜不收

却問清居真了未  
樹邊蓑笠為誰留

都下別友人

海內故人少  
市樓新酒醇  
與君聊一醉  
分袂此殘春  
北道邢臺路  
東州泗水濱  
相期復何處  
京洛舊風塵

寄魯平

平也青雲器  
鄉評推孝廉  
高懷焦尾濬  
壯節湛盧鉞  
與我偏心照  
論交以道詹  
逸羣容策蹇  
美盼對無鹽  
振楫期同濟  
提衡豈致嫌  
前年稅征鞅  
彌月憩衡芒  
環堵藜

為榻圭門席掛簷未曾憂四壁聊與醉青帘且默何嘗  
說雖寒不附炎伏龍當自起躍馬要誰占舌在居貧樂  
情親茹蓼甜雅遊傷遽散流景願將淹信斷傷秋鴈愁  
多伴夜蟾不堪男女淚北望一漸漸

寄郭誠思華下茅齋

舍在世塵外松扉夜不關心同秋水靜身共野雲閒自  
得逾三樂誰堪話九還它年玉泉約何以救衰顏

寄題都下知友山亭時在新定



古郡利名外萬山雲靄中思君痛飲處累石小軒東觀  
闕風光近郊園野趣同溪頭對魚鳥未羨舞裙紅

菴堂書懷呈郭誠思

曉駕白龍車氤氲入紫霞翠微雲外路碧落月中家馭  
過剛風騎閒如迴漢查幽窓一歌枕世慮自空花

誠思約以初秋東來相過輒馳短韻以速行期  
已聞露葉寒蟬急休待霜空曉鴈催不是相思閒命駕  
無為弟子望師來

留別所知

雪擁歸程朔吹寒來時孤劍繫征鞍此行誓不忘知己  
昨夜為公重一彈

熙寧壬子歲寄丁未同甲諸公秦亭呂宣徽寶

臣汝陰歐陽公少師永叔京下王尚書仲義

時並六  
十六歲

百二十年名上壽浮生百歲實稀聞百年三萬六千日  
今已三分過二分嘯歌獨喜齒全在文字看來眼未昏

酒量雖衰猶得醉塵中人事自紛紛

聞翰林承旨宋子京尚書捐館

平昔雍容兩禁游共陪帷幄奉咨謀功名不到麒麟閣  
詞賦空傳鸚鵡洲事業三朝虛物望聲華一代擅風流  
清時只作文章老誰識深懷蘊九疇

哭劉潛

嘗謂君才似武侯草廬牢落臥龍愁天公不念蒼生故  
元叔堪憐郡吏休蒿野已埋經國策巖廊誰是富民侯

朝廷今始思英俊不見庖丁刃一投

君沒二年西陲聚師朝廷拔用才士

而碌碌競進矣

聞郭誠思解化

溪堂月榭幾分盃暫住三峰約便回

君近從東平歸華

齋榻忽

留青竹去庭除不待玉棺來人間如幻寧同恨天上修

文亦用才

顏回王弼皆為帝所修文郎

碧秀煙雲無限好此生勿復

望崔嵬

太華東曰玉秀峰一曰碧秀黃神谷過峯下水聲聞百步外僕嘗與君遊而樂之約營居其下

方得地且葺之

簡徐登道人

聞說頻來帝里遊  
藥鑪何日得同流  
勸君只就紅塵裏  
撥轉河車萬事休

葛居士詩

并序

葛居士名自成絳州曲阿人世農家貲業富贍天性至  
孝喜誦佛經以父母疾凡燒六指於鄉黨有行義壯而  
染惡疾漸劇且將自沈於汾水夕有老父過其家而求  
宿與之語居士更悟向之所為妄著我見爾詰朝挺身

行乞抵華陰遂登蓮花絕頂茹草木精脩五年辛勤備至眉鬚復生鼻通息聞華陰人郭誠思有道造焉誠思欣納之然但以為丐者不知其鄉里族姓也見誠思不食亦不食久之誠思諸兄惡之數詬逐居士遜辭不見容因自道姓名謂誠思曰余曲阿人初行來時家不知也今一歸亦善君為遣人告余家誠思遣僮往告之旬浹兄弟僕馬來迎比近鄉邑父母及其子皆至相見悲喜去其家二十里所白其父母曰免之來以絕二親之

望念也浮世幻緣緣盡即離請從此別端坐泊然而逝  
居士不識字諸經皆口授而誦之及自峯頂而下出語  
皆成偈頌時亦為詩章理意高遠不類世俗之辭其偈  
句有妙法白蓮清淨脩又云法眼觀時世稀有俗眼觀  
時是癡人今採其句為葛居士詩云

三峰頂上五經秋妙法白蓮清淨脩無數天花常自散  
真空性水不停流病癡誰問維摩詰俗眼徒嗟冉伯牛  
別有妙身諸相具金剛堅固異浮漚

月夜吳春卿蕪儀甫相過會飲忽聞五鼓遂同

入朝

清風涼月滿前軒邂逅相逢索酒罇東有啓明俄動色  
北來寒鴈亦驚魂相車未過塵先起宮漏纔終市早喧  
階下從人催上馬百官已是簇朝門

寄崆峒天水公

先生莫可測滄海遠沈沈詹尹徒端策昭文不鼓琴一  
九天上藥幾日靜中吟安得菊花酒盈卮金液深



赴錢塘吳江道中寄侍讀王君貺侍郎

時王赴太原

畫舫浮震澤煙水接秋空一霎過雲雨滿帆開岸風酒  
旗蓮蕩裏僧剎橘洲中何似并州路塵高馬隊雄

趙先生王屋杖

待月移肩倚聽琴向膝橫溪橋經雨滑山屐入雲輕擊  
水乖龍起書空老魅驚夜歸聞石響鶴舞遠來迎

中秋夜清思臺獨坐對月寄太傅魯魯公宮師

趙公

萬籟沈聲羣動息纖塵絕跡片雲無此時何物名身世  
一點靈光徹太虛

蘇子瞻寄鐵藤杖

隨書初見一枝藤入手方知鍛鍊精遠寄只緣憐我老  
閒攜常似共君行靜軒獨倚身同瘦小圃頻遊腳為輕  
何日歸舟上新洛拄來河岬笑相迎

西齋偶書

祖錄忘筌後丹鑪住火時浮生更無事燕坐復何思暖

日移碁局寒風促酒卮  
世間安樂法不獨淨名知

南原觀田


日長春事動田野膏脉輕  
草青布穀過桑綠新蚕生雨  
足有酒色社近聞鼓聲牛羊  
暮歸飽舍中燈火明

和叔平少師見示知足吟談宗旨也

昨日看公知足吟寂然不動至人心  
視身無實元泡幻  
觀世皆空謾古今忽忽歲窮駒度隙  
塵塵事過鳥遺音  
從來兩箇泥牛鬪一任相將入海深

大梅云我見兩箇泥牛鬪入海直至

如今無  
消息



樂全集卷二

欽定四庫全書

集部  
樂全集卷  
三至五

詳校官庶吉士<sub>臣</sub>龍廷槐

檢討<sub>臣</sub>何思鈞 覆勘

總校官中書<sub>臣</sub>朱 鈐

校對官中書<sub>臣</sub>吳 俊

謄錄監生<sub>臣</sub>周克鵬

欽定四庫全書

樂全集卷三

宋 張方平 撰

律詩

初春遊李太尉宅東池

蓬島靈仙宅，星河帝女家。  
波光泛金翠，樓影動雲霞。  
清淺遊魚過，參差垂柳斜。  
移舟更尋勝，遠見小桃花。

題代祠部書院

代淵蜀人，天聖二年登上第，歸鄉不仕書院，在青城山。

上第西歸即棄官，此人趣味亦堪憐。  
風波常自廟堂起，

雲壑不隨朝市遷野叟饋漿羞客氣山僧投拂悟塵緣  
青城山下空堂在留入華陽續舊編

登泰山太平頂

區區魯國爭蝸角矗矗齊城礫蝟毛萬壑相傾知地險  
浮雲忽散覺天高蒼煙自古埋塵世紅日中宵破海濤  
七十二君迷舊迹空教秦漢侈心勞

題樂全堂

莊子云樂全之謂得志古之所謂得志者非軒冕之謂也謂其無以並其

樂而已矣

樂全得意自莊書靜閱流光樂有餘  
四句幻泡明般若  
一篇力命信沖虛  
心閒自覺浮雲薄  
才拙誠知與世疎  
只此空名漫兒戲  
何王城闕不丘墟

逍遙堂

真樂不違俗紅塵自滿城  
捲簾寒日暖高枕暑風清  
世累離憂患天和得性情  
五時依約合多謝白雲生

李少傅佚老亭

得謝自廊廟事高疏  
仲翁安車雖駟馬歸路已冥鴻  
令



子承良治朱轡治左馮緇衣方改造列鼎有餘豐屨杖  
居多適軒裳夢覺空天倪希柱史性理問能公憲檻開  
瀟灑風煙接鬱葱上方思賈誼即奉小輿東

彭門城上見鄉人社會懷古

南北分疆域此城當要津幻泡興廢速蠻觸戰爭頻世  
換山河舊時平井邑新喧喧村社散多是白頭人

彭門公庭古檜為風雨所摧

杳杳參天氣亭亭構厦材千年對霜雪一夕折風雷枕

靜踈聲減庭寬翠影開梧桐與楊柳嬌色倚樓臺

暮秋登彭祖樓

徐州

危樓古城角山色遶蒼蒼寒日下何速清風來甚長煙  
塵思戰國雲水似江鄉重九登高近堦前菊已香

經遠樓

下六篇皆秦州  
公署共一樓耳

中夏聖人調律呂八荒異國入圖書從容德讓唐虞遠  
馳騁戰爭秦漢餘不道鼓旗無勇將須知俎豆有真儒  
功臣騎虎凶而國常向冰淵審廟謨

邽翠樓

一川墟宇暮煙中樓堞籠山氣象雄北路荒原戎子國

古邽戎之地

東坡斷塹隗囂宮馬來洮海蕃城近

涼州漢西海郡今洮

河首領角所居

鶴去遼天越洞空

山有越溪洞耆舊傳言洞口有詩云越溪道士人不

識上天下天鶴一隻洞門深鑠玉窻

寒滴露研硃點周易因此為越溪洞

三十六程勞極目

隴雲猶在故關東

睢陽至秦三十六程

道齋

瓊籤隱訣舊曾尋共秘還金妙旨深會向本源分造化

即拋塵劫出來今含生皆是坎離氣復會自知天地心  
幻事徒勞聊一笑他時雲壑有知音

禪齋

昔年曾見琅邪老

惠覺  
智先

為說楞伽最上乘頓悟紅鑪一

點雪忽驚闇室百千燈便超十地猶塵影更透三關轉  
葛藤不住無為方自在打除都盡即南能

涼軒

樓下涼軒六月涼風窓一枕傲羲皇壽山雲影浮空近

羅谷泉聲遶砌長  
迴覺風塵非此世  
不須雪月更交光  
最宜羽客冰霜骨  
共引瑤卮沆瀣漿

精思閣

仙術初脩自性情  
本除陰濁養陽明  
三田窈窕通虛白  
一路層層徹太清  
寂不動中方見道  
思無邪處好存誠  
君如欲到逍遙國  
須自還元第一程

涼軒秋意

南嶺雲嵐開曉霽  
北窓松竹度涼颼  
閒歌碧簟石琴薦

靜味丹經金鑰匙夢幻泡中何得失雀蚊蚋處苦喧卑

更令薰被澄心閣客自三峰到有期

華下郭誠思去秋到秦寓於府署澄

心閣今秋復約西來

### 秦州即事

邊清羽書息事簡使君慵地僻俗客少日長春睡濃平

安三路火

秦州烽火候自沿邊三路而來

昏曉兩山鐘

南山北山皆有鐘

戍滿

歸心動先隨渭水東

秦州後園春宴贈部署劉几閣使

几深曉音律

柳暗三眠困花繁二月香

秦州後園有二月花開最情  
早繁艷甚盛絕有清香

懷當酒盡興味為春長疊鼓漁陽節清謳北里粧堦前

樂無誤席上有周郎

秦州晚宴即席示諸賓僚

秦川節物似西川二月風光已不寒猶去清明三候遠  
忽驚爛漫一春殘香隨芳樹頻移席晴愛遙山久凭欄  
却憶京華勝遊處常為暮景促歸鞍

隴西郡麥積山有獻白鹿者潔如霜雪馴養逾

年放歸舊山十二韻

地得金方正山藏靈物珍月宮遺玉兔仙仗失霜麟乳  
竇冰泉冷晴原露草春清風生澗壑高格對松筠久臥  
常存息凝思若養神煙崖一蹭蹬華館久埃塵我意本  
雲水無心愛珮紳平生厭俗客待爾當嘉賓蕭灑襟情  
遠虛恬氣韻真檜軒同鶴靜竹渚伴鷗馴龜智雷驪血  
犧純被繡巾放歸舊林麓好去避虞人

題松江曹生學舍



江邊無限地君舍劣容蝸急鼓田家社踈鐘野寺齋執  
經多卉服牽封待荆釵秋雨鱸魚美時應釣蘚崖

金陵府署池上草堂

東方千騎忝藩侯情味都如寓一丘客氣盡將還野馬  
機心聊自試沙鷗時憑靜几隨飛蝶強拂危冠笑沐猴  
只向公齋得嘉遯何須遠逐赤松遊

送履韓仲文

江南到梅暑蒸濕鮮晴明聊做登山樣無妨涉水行齒

牢防易折蠟滑亦加輕早幸還吾土閒將掛後楹

夢中吟

神歸自何處記此夢中吟道為無心合人因省語深

此兩

句夢中作  
窓燈寒影薄庭月曉光沈  
悟境真泡幻迷情妄古

今

秋夕聽彈五絃琴

古風久已壞今夕聞遺聲恍若忘身世怡然通性情  
緬懷有虞氏曠想三代英此時知此意青天秋月明

李太尉園池

魏國獻穆大長公主子

驃騎子侯第長門大主園煙波二宮賜

仁宗初章獻皇太后稱二宮賜

主宅東池廣池榭

宸翰四朝恩

四朝所賜御札刊石在第

禪客常搖拂

先都尉好

延禪僧

名流必解軒

朝之名勝必集君第

春風與秋月好景不空罇

城南林園避暑示道友

不必山林遠且離朝市喧前軒好風月  
高客共琴罇在所同浮世何須憶故園  
八瓊還返事聊更話根源

函谷關

沛公弔伐軍戲下百二魯無藩棧牢天險固非一姓有  
孫謀寧在兩嶠高懸崖通棧遙連蜀絕巘橫空勢走襄  
幾見狂圖矜四塞泥丸封處竟徒勞

遊琅邪山寺

一徑過蕭森幽提此獨尋俗遊殊不意僧話粗寬心役  
役真何了空空究竟深塵勞何日脫來伴遠公吟

火車同郭誠思作

火車雙輪駕九虬出海直上崑崙丘經天三百六十度

匝日一萬四千周電破重陰霹靂過風開霽色煙雲收  
乾闥坤軸極排轢勢闌却返無為洲

初秋即事

久雨新晴後秋風初起時天倪一清曠精爽入希夷壁  
上吳生畫床頭杜老詩平常性酷愛對眼忽如遺

冬過豪貴故園有感

蕭蕭霜草曉風秋憶是當年最勝遊車馬自隨寒日急  
管絃肯入野雲幽流渠水斷魚何往高樹陰疎鳥不留

為問主人曾到否自家池館待誰修

辛未清明感事

二十四年流水東早為名誤逐飛蓬事隨過鳥去無跡  
愁似濁醪傾更濃好是把花歌北榭更休提劍哭西風  
壯心鬱鬱身牢落幾見中林鶴髮翁

秋夜禁直

朝著紫宸殿直廬金馬門楞伽百八句柱下五千言何  
處求花藏忘機即漆園涼宵萬籟寂明月在前軒

再入禁林即事

重到金坡二十春

慶歷六年自學士出領郡迨今正二十年

閒思出處一傷

神略行大地山川遍

歷昇杭秦益徐鄆等十郡府

再覩青天日月新

感昭陵也

踈籟豈知諧律呂散材無意入轅輪何時却出都

門去靜掩巖扉老此身

兩浙張兵部秋日牡丹詩次韻

霜天慘澹過重九忽見幽芳發故叢多愛清香對亭檻  
不堪踈葉下梧桐他年仙去空華表此夜魂歸尚漢宮

過眼須為無色觀  
返童疑有內丹功  
寫題更愧詩情淺  
折帶應宜醉臉紅  
須為重重張翠帶  
可憐羸怯不禁風

病眼

飛花無復數  
遇物輒成雙  
書畫踈幽閣  
屏幃戀北牕  
懶開辭俗客  
寫望憶秋江  
椒菊供朝餌  
猶須發酒缸

江樓遲客

靜外游神迴  
望中塵物稀  
天連遠水盡  
鳥背夕陽飛  
木葉初搖落  
鄉懷動式微  
興闌不忍去  
遲子一舸歸



夜意

羣動已沈響蛩吟時一聲露寒仙掌重月午庾樓清  
慷慨聞雞舞悲涼感笛情幾多塵役者夙駕待鐘行

夜蟲

庭戶閒扃月草根寒帶霜時方感搖落爾更助悲涼  
漏版敲孤館燈青背曲房向晨轉哀急幾斷旅人腸

風琴

露華月色澹軒庭風過時同衆籟鳴誰掛機心在絃索

有絃寧更有全聲

寓興

代舍悲彈鋏夷門默抱關風雲未時會意氣與身閒  
劍為屠龍礪弓須待虎彎君看緯蕭子一旦探珠還

題葛驛李校書壁

八十不扶杖看書夜每深自言非服藥無事可關心  
景為詩曾愛花因醉尚簪去城無一舍路若隔飛沈

蟬

紅樹依依古驛西一聲長是報秋期  
新晴忽見橫飛過落晚最傷孤嘯時  
陰激英雄增感憤潛催節物至蕭哀  
草根蟋蟀霜前鴈共與愁人染鬢絲

柳 吳體

翠眉含愁展新葉長袖善舞拖舊條  
黃鶯初囀一何喜紅桃相映不勝嬌  
行人歇馬近驛路漁叟繫舟臨溪橋  
斜風細雨與殘照不妨意氣常飄飄

雲

無端聚散千形出本是輕清一氣浮終古光陰寧變壞  
四時景象自遷流寶華馥郁周三界綵仗氤氲過十洲  
遠望非煙籠鳳闕近觀如穗起龍湫餘霞映日晴相照  
素練橫空晚未收迴漢歸槎遙泛泛碧天孤鶴靜悠悠  
驚禽逸獸情無待陣馬風檣勢莫留泗水高歌增感慨  
陽臺殘夢作閒愁斷虹落照江城暮澹月踈星禁省秋  
過嶺時隨樵叟去傍溪聊伴野僧遊久陰決滯重重積  
忽霽飄零片片幽待物方行嗟滯影乘波妄觸笑虛舟

仙家五色隨鸞駕海面千尋立蜃樓雪意低濃傷旅館  
歲朝黃潤喜農疇初微觸石纔膚寸曾不崇朝遍九州  
生施功成讓雷雨無心却返舊山頭

蝶

遲景融融暖氣浮中園曲密小庭幽春風故引顛狂甚  
芳樹相容爛漫遊不分風流輸楚女懶將身世問莊周  
有時潛見多情處每遇王孫盡日留

螢

土潤正溽暑幽庭熠燿飛陳芟未全脫生氣一何微風  
急光不滅月明景共稀蠨蛸與蟋蟀時節伴依依

歸燕

社後日猶暖雨前春尚寒乘時衆來易無伴獨留難京  
洛柳花白瀟湘楓葉丹堪傷季秋雀風急海漫漫

柳

雨細池塘靜風斜院落深蝶飛隨亂絮鶯嚀入濃陰翠  
帶堪紉佩金絲可度針願依菩薩手不上美人簪

七里瀨

古有桐君住漢時嚴子來山橫疑路盡溪轉若天開塵  
世不相接海潮從此迴維舟上層巘戀戀白雲堆

驚秋示三茅山人陳谷

晚來枕簟涼杖屨望平野疾風卷浮雲黃葉如雨下奈  
此急景何忽過如奔馬九丹功未成幽恨將誰寫

清明連上巳

治平丙午三月四日清明

踏青原上飲袂楔水邊歌佳節相連好遊人一倍多

齊魯道中望睢陽有念

重疊荒山滿四圍  
征鞍繫劍背斜暉  
遙知梁國白雲下  
此際吾親獨倚扉

對酒

醉裏翻身天地窄  
愁來天地不容身  
可憐澤畔行吟客  
爭似壚邊高臥人

赴益部途中

此下二十六首  
赴益州路中作

中臺分虎節  
全蜀領龜城  
山色二千里  
水聲三十程  
煙



村深谷火雲棧半空鈴野館無鐘漏猿吟曉月明

行次岐山

坤維五十郡麾節忝師垣緩轡猶秦甸前驅已劔門儻  
來增客氣重寄愧君恩昨夜岐山夢三歸修竹園

過灞橋長安道上作

漢牒熟當披舊跡灞橋今忽過征鞍前朝宮殿煙蕪遠  
四望河山古木寒自古功名應邂逅大家岐路妄汎瀾  
興亡甚費生靈血只得高人夢幻看

青泥嶺

斗峻凌霄出混茫  
東西秦蜀此分疆  
縈紆斷澗千尋曲  
回合危巒萬疊蒼  
煙外孤村通鳥徑  
雲間盤道遶羊腸  
朝家方面非輕寄  
何事徘徊望故鄉

華州西溪

西溪殊近郭  
少華更當軒  
竹徑通華表  
松庭接紺園

過長安至岐山作

高原極望秦川闊  
危棧橫空蜀道長  
多謝終南山色好

迢迢相送過岐陽

過張真人洞

兩當驛西亂竹谷口  
張果真人所隱處

谷口巒岈獅子山洞門高掩白雲閒  
自慙末裔無仙骨  
名利途中鬢已斑

籌筆驛

本規一舉定乾坤  
遽見長星墜壘門  
公在必無生仲達  
師昭何業得中原

雨中登籌筆驛後懷古亭

山寒雨急曉冥冥更躡蒼崖上驛亭深秀林巒都不見  
白雲堆裏亂峯青

興州長舉縣西二十里閣道立表曰飛石閣告  
往來者急度勿停予赴益部興州將吏來迎  
皆至長舉因訪老吏飛石之狀云昔嘗有之  
亦飄風暴雨之時也予望山頂皆已墾耕而  
行人熟虛名至是皆馳過因成一絕

蜀道循山多險巖行人獨此策征羈人情多為虛名怯

鶴唳風聲走老氏

劒門關

地維絕脉摧鼇足天壘橫霄壯井輿誰輒禍萌通鳥道  
古來風土感魚鳧壺中日月隣方外海內山河入帝國  
過此益知方面重萬兵開府一寒儒

華山雲臺觀題希夷先生陳搏影堂

林壑雲深接玉泉松齋閉息輒經年一無標致惟隨俗  
別有真機在指玄詔板嘗延清暑殿詩筒時到華陽川

蛻形雖在張超谷粟粒珠中自在天

相國杜公舊里錢唐有別墅在華下公既得  
謝留寓睢陽因家焉某近赴益部過三峯聞  
華人之望公捨而不還又顧吾鄉之獨幸國  
老處焉因道西人之意成長句四韻奉

寄杜公

謀國有勞新史在掛車無第舊鄉遥睢陽圖記光耆  
彥華下風烟遂寂寥紫氣尚勞關吏思甘棠猶播陝民謠

蓮花峯下仙人掌高出雲端若奉招

上亭驛

在劍州武連縣西四十里傳云唐明皇西幸到此雨中聞鈴聲感懷命伶人寫

之樂府名

雨淋鈴

雨中駐蹕此聞鈴當日梨園寫此聲忽忽悲心自多感  
鈴聲何事愴人情

散水巖漱玉亭

在嘉川驛西水從峯頂迸落三節而緣崖為瀑布入澗合

于江

高從雲際落崔嵬疑決銀潢一派來散漫難收珠網綻

琤琮不斷玉山摧尋源誰到煙霞路稅駕聊傾沆瀣杯  
向暮危亭上燈火水精簾下燭房開

泥溪驛

嘉陵江到水瓜園水勢東迴入浪川前過劍門山路穩  
免尋閣道上雲巔

杜鵑

過興州入青陽峽即多杜鵑當冬月不聞  
此鳥聲蜀人云杜鵑飲春水即啼靜夜曉月



更凄切入秋即無聲

蜀道寒輕水木清  
峽中無復杜鵑聲  
歸期正是春風暖  
任向空山叫月明

過嘉川驛

嘉陵江上嘉川峽  
古木雲蘿千萬峯  
閣道緣山已經月  
縈迴未出畫屏中

飛仙嶺閣

蒼崖老樹雲蘿合  
絕澗驚湍閣路高  
羽駕飈輪殊惚恍

依程緩轡未為勞

亂石溪

武興郡西飛仙嶺迸流而下

亂石崢嶸散粟堆飛湍奔瀉萬山開  
轟空急若雷車過  
振壑傾疑地軸摧銀漢勢從天際落  
雲濤聲破海門來  
迸泉疊巘平生愛欲轉巖隈首重迴

魚關詩

青泥驛西二十里危巖疊嶂曰魚關山小亭臨嘉陵江江有石關水從石罅迸

流魚不可過故以為名春夏水大沒石魚行無礙矣

中流石埭隱如碓

音堆五嶽舞而相追

鼓鬣徜徉此復迴春水漸

深沿泳快為傳尺素錦江來

青陽峽

奇峰疊嶽無重數橫澗飛泉會一谿老樹藤蘿從古長  
寒空雲靄與天迷幽中應有神仙住深處唯聞猿鳥啼  
野性舊多山水癖恨無心賞此相攜

藥水巖詩

武興長舉縣東十里藥水亭下官道  
三四里亂石崢嶸流泉迸激峻嶺十

四盤而至石洞懸乳三皆徑圍二三尺下有  
石臼容可四五斗石泉尋乳下滴臼中溢而  
流入嘉陵江洞外有大石砥平云仙人鍊藥  
臺也俗傳此泉飲者愈宿病予過而步遊焉

冰雪千巖松風萬壑崎嶇僅能至不通  
騎也因留長句時甲午十月二十三日

靈泉一派蜀江通源出蒼崖古洞中乳滴雲根苔白滿  
藥成仙竈石臺空瓊纓珠絡千巖雷瑤瑟琅簫萬壑風  
杯勺已忻清病骨刀圭敢望變衰容

宿龍門洞

在三泉縣西  
即古葭萌

路到葭萌古道邊層崖疊磴入蒼煙忽逢方丈在平地  
何意中途過洞天四面濃嵐圍碧嶂半空急雨迸飛泉  
一宵身世離塵境却撫征驂懶下鞭

嶓冢

漢江之源所出蜀道金牛驛西七里有嶓冢  
神祠山勢峻峭水源甚微經祠前西南緣山曲  
折至興元之西縣諸山澗相合漸大而為漢江  
因思頃年泝漢嘗值風波之險遂留題一  
絕

江漢朝宗入海長嘗蒙起浪卷輕航金牛西路經嶓冢  
却見微源此濫觴

過汧河

岐南一舍過長汧路近陳倉始入山三十三程橋棧外  
平川始下鹿頭關

采真堂贈郭誠思

香車曉駕九花虬笳管聲中到十洲太一元君傳密命  
許君長住八瓊樓

聞蛩

慘澹霜風月色寒愁人無寐坐閒軒別聽一部淒涼曲

幾種秋蟲咽草根

探春

妙句江春入舊年  
江梅長向臘中殘  
梁園地冷春來晚  
試劈垂楊舊眼看

天寒

風裂幽牕水澤堅  
寒郊空迴澹無煙  
何因得向桃源去  
景氣長如二月天

慧聚寺東亭

野色秋光共沈寥水村籬落晚煙交拄筇回就下山路  
行看斜陽隱樹梢

縣齋懷京都

東南古縣介江皋西北神州倚斗杓安得葉君傳秘術  
時飛雙鳥詣臺朝

曉景

樹帶曉霜寒矗矗山含宿靄遠重重誰家收得汾陽筆

八幅羅浮晦景濃

郭忠恕有畫羅浮山  
陰晦景圖世稱神絕



春郊

攜樽縱步尋芳墅  
聊藉芊芊手把紅行樂  
豈關閒客事  
少侯長日占春風

夢後

索索幽蟲急曉風  
玉繩西下露華濃  
遠鐘驚覺牕燈暗  
依舊江山一萬重

書吳興僧興公院壁

僧久不出院

我愛雪溪風景閒  
年年魚鳥伴湖山  
利名人到心猶靜

況是老僧長閉關

耳鳴

一陽初獨嘯兩耳遂雙鳴  
寒谷踈鐘遠霜空衆籟清  
千鈴行險倦萬鼓戰酣聲  
瀑落山頭峻濤翻海面平  
風檣開大浪曉角動嚴城  
隴首悲涼意蘇門曠逸情  
鳳簫雲外過龍笛月中橫  
細轉縲車急微搖抗櫓輕  
衰殘傷老態馳徇厭時榮  
處世希蒙叟觀身愧淨名  
神明思內守豪蕩悔平生  
素問方家本巢源導引精  
早年曾有客奇

術可還嬰何日開金鼎靈丹見八瓊

蟬

密槐遮急雨疎柳帶斜陽  
緜嶺餘音遠蘇門清嘯長  
附冠金翼薄橫鬢玉釵光  
高潔自天稟寧同蜂蝶狂

題李先生隱居

金丹一指自崆峒便控飛輪駕赤龍  
况是曾居小有洞

先生舊隱王屋

更應不住易遷宮

易遷宮初得道者處焉

紫文寶訣三元

秘皇象靈符二景通却恨勞生聞道晚  
九還未就已衰

翁

芭蕉李都尉宅金淵閣分題得淵字

吳僧  
新寄

遠寄江城外新栽水閣前虛心勞可尚幻質定非堅

佛經

云是身不  
堅如芭蕉

扇薄搖涼殿盃深泛綺筵忽疑鸞鳳過翠影

落金淵

赴新定過七里瀨

舟過嚴陵瀨涼秋水木清鼓旗知郭近魚鳥見人驚雲  
亂迷山色灘長雜雨聲一毫名利事搔首愧平生

挽辭

仁宗皇帝挽辭三首

享國承熙盛斯民老太平無私均覆載大德共生成陰  
隲無留迹神功不可名曰仁歸禰廟時夏繹清明

臨御自初終恭勤一日同慈心夷夏等誠意地天通垂  
拱成文治安和即武功含生遊壽域四十二年中

謨訓垂寬大基圖得顯承新宮開玉鑠舊冊閱金滕龍  
駕歸虛極鸞旗建大升平生懷孝慕游仗展三陵

英宗皇帝挽辭五首

不問大橫兆天人心是真謳歌早歸舜氣志自如神正  
合乾坤體明開日月輪孜孜朝晷意克己為生民  
舊學多聞富咨周聽德聰乾元純用九豐日正宜中治  
迹傳英烈神明遡閭風平居修五事洪範在潛宮

八月初涼後千年此去長朝廷留事典戶牖想容光濯  
景遊霄極乘雲返帝鄉春秋大居正天統付元良

遣奠宣哀冊嚴行按字圖橋山仙去遠渭水月游初儉

制遵遺訓方中列舊書龍輜三十里笳鼓節聲徐

瀍東五陵陌嵩下萬安原風水通佳氣靈祇護至尊國  
容回吉仗像物闢神門清廟標英德流光萬古存

神宗皇帝挽辭五首

并引

臣伏以大行皇帝山陵有日哀纏萬國昊天罔極中外  
羣臣多進挽辭臣早忝近班受恩深重今聞靈駕發引  
在近老退田廬無由得伸號慕自勉荒陋謹著挽辭五  
首隨狀上進

義軒前載遠虞夏信書傳比德皆尊大惟皇克繼先五  
陵同厚地兩曜出高天制作流方策憂勤十九年

經綸成盛業震耀烜威神粹氣同乾健含生自化醇無  
文皆受職重譯競來賓東觀成書日方知百度新

經始開三殿晨昏奉二宮承顏專致樂教孝遂移風訪  
對朝曦昃程書夜漏終艱難思稼穡意在紀元中

獻智由天縱規摹繼祖貽有為皆社稷無逸著屏帷傳  
令通湟陜賡歌及島夷時髦俱入彀流美辟雍詩



廣大天同量淵深海共澄遽聞憑玉几恨不瘞金繩同  
軌陪儀仗因山鑠闕庭深恩淪朽骨孤夢遶新陵

溫成皇后挽辭二首

何事高前烈忘身衛至尊平生彤管在憂國玉刀存一  
惠彰柔德深衷憶善言淒涼金殿月還照給孤園

美化成麟趾勤心念兔舄厥衣薦翬翟靈仗咽簫笳香  
海歸華藏晴霄散綵霞春風青瑣閉侍女泣宮花

故相贈侍中廣平公挽辭三首

風采來塵外才名入洛初清言還正始雅度合冲虛玉  
氣千尋直金精百鍊餘雍容到巖廟一世共華胥

不與椿齡遠先傷棣萼零宸章懷舊德惠節入新銘後  
世推名教當朝重典刑東維跨箕尾一化本同靈

謨明餘論在記博近書傳得謝三司重歸休五福全國  
門迴鹵簿嵩麓望松阡天下中庸法寧惟伯始賢

故端明殿學士工部尚書致仕清源王公挽辭

二首

臺閣留風論藩垣著治功時皆推舊德心自信孤忠驥  
騁常疲險鵬搏不遇風晚年探妙理頓看世緣空

世德承槐蔭朝評許棟材都堂陪八座近府阻三階燕  
閣清宵閉佳城白日開南阡有一去冠蓋不重迴

故兵部侍郎致仕安定公挽辭三首

晶粹分天婺深長自帝虞義聲高北海政事達夷吾歷  
職小司寇退身賢大夫獨嗟造化手不得鼓洪爐

經濟期成務康寧遽引年人知三事貴我愛二疏賢金

石名儒刻弓裘孝子傳國書循吏傳誰在老成先

湖暖春波闊山晴宿霧開空觀素車過不復畫船來柳  
外悲簫度松間送騎回鄭人懷子產行灑有餘哀

樂全集卷三